

REPUBLIKA Y'U RWANDA



MINISITIRI W'INTEBE

**IJAMBO RYA MINISITIRI W'INTEBE
NYAKUBAHWA DR. NGIRENTE EDOUARD,**

**KU ISHYIRWA MU BIKORWA RY'IMYANZURO Y'INAMA Y'IGIHUGU
Y'UMUSHYIKIRANO WA 16**

Kigali Convention Centre, ku wa 19/12/2019

- **Nyakubahwa Perezida wa Repubulika y'u Rwanda,**
- **Bayobozi bakuru b'Inzego zitandukanye z'Igihugu cyacu muteraniye hano,**
- **Batumirwa mwitabiriye iyi Nama y'Igihugu y'Umushyikirano ya 17,**

- 1.** Ndagira ngo mumfashe twongere dushimire Nyakubahwa Perezida wa Repubulika wadutumiye muri iyi Nama y'Igihugu y'Umushyikirano ya 17 kandi tunamushimira impanuro yatugejejeho.
- 2.** Mbashimiye kandi uyu mwanya mumpaye kugira ngo ngaragaze uko imyanzuro y'Inama y'Igihugu y'Umushyikirano ya 16, yabaye umwaka ushize, yashyizwe mu bikorwa.

- **Nyakubahwa Perezida wa Repubulika,**

- 3.** Inama y'Igihugu y'Umushyikirano ya 16 yabaye kuva tariki ya 13 kugeza ku ya 14 Ukuboza 2018, yafatiwemo imyanzuro 10.
- 4.** Mu rwego rwo kuyishyira mu bikorwa, iyi myanzuro twayigabanyijemo ibikorwa 58. Ibikorwa 47 bingana na 81% byashyizwe mu bikorwa nk'uko byari biteganyijwe (75-100%). Ibikorwa 7 bingana na 12% bigeze ku kigero kiri hagati ya 50% na 74%. Naho ibikorwa 4 bingana na 7% ntibyashyizwe mu bikorwa nk'uko byari biteganyijwe kubera impamvu zinyuranye (<50%).

- **Nyakubahwa Perezida wa Repubulika,**

1. Ku mwanzuro wa mbere warebanaga no kuvugurura imitangire n'imitangire y'inguzanyo zihabwa abatishoboye zinyuzwa mu Murenge-SACCO kugira ngo bafashwe kwivana mu bukene vuba no kwigira.

- Havuguruwe Gahunda ya serivisi z'imari za VUP (VUP Financial service scheme) nk'uko byari biteganyijwe ndetse hanozwa n'ishyirwa mu bikorwa ryayo.
- Mu rwego rwo gushyira mu bikorwa iyi gahunda, Guverinoma y'u Rwanda yayigeneye ingengo y'imari isaga gato miliyari icumi na miliyoni magana atanu. Kuri ubu, hamaze gutangwa agera kuri miliyoni magana ane mirongo itatu n'eshanu ku mishinga 4,199 yujuje ibisabwa.

Mbere yo gutanga izi nguzanyo, habanje kwemezwa amabwiriza mashya azigenga, no guhugura abakozi babishinzwe ku Karere no ku Mirenge mu rwego rwo kurwanya amakosa yagiye agaragaramo mbere. Akaba ari yo mpamvu ikigero cy'inguzanyo zatanzwe kiri hasi. Tukaba twizeye ko kigiye kuzamuka ku buryo bwihuse mu minsi iri imbere.

2. Ku mwanzuro wa kabiri wo kunoza imikorere y'Umurenge-SACCO muri rusange kugira ngo urusheho kugera ku ntego washyiriweho no gufata ingamba zo kwishyura vuba abawambuye.

- Ibigo by'Umurenge SACCO 267 byaragenzuwe (audited). Naho Ibigo by'Umurenge SACCO 143 byakorewe ubugenzuzi (inspected) bugamije kureba ingorane bifite mu micungire yabyo ya buri muni.

- b)** Ubu bugenzuzi bwatanze umusaruro mwiza kubera ko, ibyasabwe na Banki Nkuru y'Igihugu muri iri genzura byashyizwe mu bikorwa ku kigero cya 85%.
- c)** Ku bijyanye no kwishyuza abambuye za SACCO, muri rusange, miliyari enye na miliyoni ijana na mirongo itanu z'amafaranga y'u Rwanda amaze kugaruzwa kugeza ubu. Ariko iyo gahunda irakomeje.
- d)** Ku ikubitiro, miliyari ebyiri na miliyoni magana abiri mirongo itanu z'amafaranga y'u Rwanda zahise zishyurwa ako kanya kubera ubukangurambaga bwashyizwemo imbaraga mu Gihugu hose. Andi agera kuri miliyari imwe na miliyoni magana icyenda yagiye yishyurwa buhoro buhoro n'abari barayambuye nyuma y'aho amabwiriza atangiwe.
- e)** Nk'uko kandi byari byagaragaye, hari abakozi ba Leta bari barambuye Ibigo by'Umurenge SACCO. Nabo barishyujwe. Bose hamwe bari bafite inguzanyo zitishyurwa neza zigera kuri miliyoni zisaga magana arindwi mirongo icyenda n'esheshatu. Ariko kuva aho kwishyuza bitangiriye, 76% bamaze kwishyura asaga miliyoni magana atandatu na zirindwi.

3. Ku mwanzuro wa gatatu warebanaga no gukomeza kunoza ingamba zigamije kuzamura imibereho myiza y'abaturage no kongera kureba uburyo abari mu cyiciro cya 2 cy'Ubudehe bakongera kwemererwa gukora imirimo ihemberwa itangwa muri Gahunda ya VUP.

a) Muri uyu mwaka w'ingengo y'imari 2019/2020, gahunda ya VUP yagejejwe mu Mirenge yose y'u Rwanda uko ari 416 nk'uko byari byasabwe mu nama y'Umushyikirano y'umwaka ushize, mu gihe mbere yakoreraga mu Mirenge 244 gusa.

Tukaba tubashimira Nyakubahwa Perezida wa Repubulika, ku murongo mwaduhaye mu Mushyikirano ushize kandi turabizeza ko n'ibitararangira gukorwa, tuzabikora tukuzuzza 100%.

b) Muri urwo rwego, ingo zingana na 158,554 zimaze kugerwaho na gahunda ya VUP.

- **Nyakubahwa Perezida wa Repubulika,**

4. Ku mwanzuro wa kane ujyanye no kongera ubuhunikiro bw'ibiribwa n'urutonde rw'ibyo Igihugu gishobora guhunika mu rwego rwo kwihaza, kandi hakanozwa imikorere y'isoko ry'ibicuruzwa by'ibanze (Commodity exchange).

a) Hashyizweho ibikorwaremezo bifasha mu kwita ku musaruro ku buryo bukurikira:

- Hubatswe ubuhunikiro 24 bw'ibigori (Maize Warehouses) mu Turere twa Muhanga, Nyagatare, Gatsibo, Ruhango, Nyanza, Kayonza, Kirehe, na Musanze;

- Haguzwe imashini 15 zumisha ibigori, zishobora kwimukanwa (mobile maize dryers), mu Turere twa Nyagatare, Kayonza, Gasabo, Gatsibo na Ngoma;
- Hubatswe kandi ubwumishirizo 16 bw'ibigori (Maize drying shelters);
- Hubatswe amakusanyirizo 7 y'imyumbati (Cassava collection points) mu Turere twa Ruhango, Kamonyi na Nyanza;
- Ku makusanyirizo y'ibijumba 46 yari ateganyijwe, hubatswe amakusanyirizo 31 mu Turere twa Rubavu, Musanze na Nyabihu; 12 arimo kubakwa naho andi 3 aracyapiganirwa isoko ryo kubakwa;
- Ibyumba 10 bikonjesha imboga (Vegetable cold rooms) byashyizwe mu Turere twa Kicukiro, Muhanga, Bugesera, Huye, Gisagara, Kirehe, Nyagatare na Kamonyi. Ariko nk'uko twabibonye haracyakenewe kubakwa ibindi byumba mu tundi Turere.
- Hashyizweho ubuhunikiro 4 bw'ibirayi (Irish potato storages) mu Karere ka Nyabihu;

b) Hongerewe ingano y'ibiribwa (quantities) bihunikwa mu bigega cyangwa mu bubiko bw'ingoboka.

5. Ku mwanzuro wa gatanu ujyanye no guhuza igenamigambi n'ishyirwa mu bikorwa mu nzego zose bireba hagamijwe kwihutisha gukemura ikibazo cy'imirire mibi n'igwingira ry'abana.

Kuri uyu mwanzuro nawo hari byinshi byakozwe n'ubwo urugendo rukiri rurerure. Nk'urugero:

- a) Abana 86,531 bafite hagati y'amezi 6 kugeza kuri 24 ndetse n'abagore 19,099 batwite n'abonsa, bahawe ifu ikungahaye ku ntungamubiri (Fortified Blended Food/FBF);
- b) Hari kandi imiryango itishoboye 26,915 yahawe inka muri Gahunda ya Girinka;
- c) Amakoperative 30 y'urubyiruko rudafite imirimo muri buri Karere mu Ntara y'Iburengerazuba yahawe ingurube zirenga 2,000, naho andi ahabwa inkoko zigera ku 63,000.
- d) Abana 9,239 (bari munsu y'imyaka 5) bagaragaweho imirire mibi bahawe ubufasha bw'amata;

6. Ku mwanzuro wa gatandatu ujyanye no gufata ingamba zo gukuraho imbogamizi zikibangamira ireme ry'uburezi mu byiciro byose, uhereye ku mashuri abanza, ayisumbuye ndetse n'amakuru.

- a) Hasowe (printed) ibitabo birenga miliyoni imwe n'ibihumbi magana inani mirongo itanu na bitatu byo kwigishirizamo kandi bikaba byarakwirakwijwe mu mashuri.

b) Hakomeje gukorwa ubugenzuzi bugamije gukurikirana ireme ry'uburezi mu mashuri abanza n'ayisumbuye, kaminuza n'amashuri makuru. Muri urwo rwego, hahuguwe abazahugura abandi barenga 1,900.

7. Ku mwanzuro wa karindwi wo gukomeza gushishikariza Abanyarwanda gukunda no gukoresha ibikorera mu Rwanda (Made in Rwanda), kongera ubwiza n'ubwinshi bwabyo no gufata ingamba zituma ibiciro byabyo bibasha guhangana n'ibituruka hanze.

a) Ibicuruzwa bishya 102, byahawe ikirango cy'ubuziranenge cya S-Mark.

b) Kugeza ubu, ibicuruzwa 57 bikorwa n'ibigo by'ubucuruzi 37 bimaze guhabwa ikirango cya Made in Rwanda.

c) Ibigo 12 byamaze kwiwandikisha mu ruhererekane nyongeragaciro (Value chain) rwo gukora imyenda no gutunganya divayi yo mu bitoki.

- **Nyakubaha Perezida wa Repubulika,**

8. Ku mwanzuro wa munani wo kurushaho kwigisha urubyiruko amateka ya Jenocide no kongera imbaraga mu kurutoza kurangwa n'indangagaciro z'umuco nyarwanda (abanyeshuri, urubyiruko rwo muri diaspora...)

a) Hakozwe ubukangurambaga ku kurwanya Jenocide n'ingengabitekerezo yayo mu mashuri 264 yisumbuye, Kaminuza n'Amashuri makuru 11.

9. Ku mwanzuro wa cyenda wo gukomeza kubungabunga inzibutso n'ibimenyetso bya Jenoside no gukemura ibibazo abacitse ku icumu rya Jenoside bagihura nabyo birimo ihungabana.

- a)** Hasanwe Urwibutso rwa Ntarama (Icyiciro cya IV).
- b)** Habitswe neza imibiri 4,640 y'abazize Jenoside yakorewe Abatutsi ndetse n'ibindi bimenyetso bya Jenoside mu Nzibutso za Bisesero, Murambi, Nyarubuye, Nyange, Nyamata na Ntarama.
- c)** Abakozi 535 bahawe amahugurwa ku guhangana n'ihungabana. Hashyizweho n'amatsinda atanga ubufasha bw'ubuvuzi. Kuri ubu, ayo matsinda akora neza mu Turere 23 ku bufatanye n'imiryango ikorana na CNLG.
- d)** Gufotora mu buryo bubika kopi y'amapaji (Scanning) 45,000,000 yerekeye imanza zaciwe n'Inkiko Gacaca byararangiyeye.
- e)** Ibikorwa byo guhuza neza amakuru ari mu madosiye birakomeje:
- Kubika amashusho ku buryo bwujuje ubuziranenge byararangiyeye mu Turere 30;
 - Icyumba cyo kubikamo amakuru ku buryo bw'ikoranabuhanga (Server room) cyongerewe ubushobozi.
- f)** Hakusanyijwe amakuru ku mibereho y'abarokotse Jenoside yakorewe Abatutsi mu Mirenge yose 416.

10. Ku mwanzuro wa cumi wo kwihutisha ishyirwa mu bikorwa rya gahunda y'Igihugu yo kwizigamira y'igihe kirekire/Ejo Heza no gukangurira Abanyarwanda b'ingeri zose kuyitabira.

- a)** Kugeza ubu, abantu basaga 280,000 bamaze kwiyandikisha muri iyo gahunda ya Ejo Heza.
- b)** Hamaze gukusanywa miliyoni zisaga magana acyenda mirongo irindwi n'icyenda z'amafaranga y'u Rwanda mu bwizigame bwa Ejo Heza. Gukusanya andi mafaranga byashyizwe mu mihigo y'Uturere ya 2019/2020. Tukaba twizeye ko iki gikorwa kizokomeza kugenda neza kandi kigatungana.

- **Nyakubahwa Perezida wa Repubulika,**

11. Mu gusoza, ndagira ngo nongere mbashimire, umwanya mwampaye kugira ngo ngaragaze ibyakozwe mu gushyira mu bikorwa imyanzuro y'Inama y'Igihugu y'Umushyikirano ya 16 kandi tubizeza ko n'ibitarashoboye gutungana dukomeza kubitunganya dushyizemo imbaraga zose.

Ndashimiye Nyakubahwa Perezida wa Repubulika.